



Broj: 01-50-1-15-37/08
Sarajevo, 2. 10. 2008. godine

ZAPISNIK

37. sjednice Predstavničkog doma
Parlamentarne skupštine Bosne i Hercegovine,
održane 22. oktobra 2008. godine

Sjednica je počela u 10 sati. Prisustvovalo je 39 poslanika. Opravdano su odsustvovali: Jovan Todorović, Snežana Rajilić i Mehmed Suljkanović.

Iz Vijeća ministara BiH sjednici su prisustvovali: predsjedavajući Nikola Špirić, ministri Dragan Vrankić, Bariša Čolak, Sredoje Nović, Tarik Sadović i Mladen Zirojević, zamjenici ministara Fuad Kasumović, Senad Šepić i Veselin Poljašević, te direktor Direkcije za evropske integracije Osman Topčagić.

Iz međunarodnih organizacija prisustvovali su predstavnici: OHR-a, OSCE-a, NATO, EUSR-a, EUPM-a i američke ambasade, kao i nevladine organizacije Centara civilnih inicijativa.

U uvodnim napomenama predsjedavajući Doma Niko Lozančić rekao je da je sjednicu sazvaio po hitnom postupku čim je u parlamentarnu proceduru dostavljen Sporazum o stabilizaciji i pridruživanju, sa samo jednom tačkom dnevnog reda, kako bi se i na ovaj način pokazalo koliki je značaj ovog sporazuma za Bosnu i Hercegovinu.

Zatim je predsjedavajući podsjetio da se u prijedlogu dnevnog reda navedenog u pozivu za sjednicu greškom nalazi i Privremeni sporazum o trgovini i trgovinskim pitanjima između Evropske zajednice i Bosne i Hercegovine, jer je ovaj sporazum već ratificiran, o čemu je, na inicijativu Sekretarijata Parlamentarne skupštine BiH, Predsjedništvo BiH naknadno dopisom izvijestilo Dom. Tim dopisom van snage stavljen je raniji dopis uz koji su Parlamentarnoj skupštini BiH dostavljeni ovi sporazumi. U skladu s navednim, predsjedavajući je za 37. sjednicu predložio samo jednu tačku, a to je:

Davanje saglasnosti za ratifikaciju Sporazuma o stabilizaciji i pridruživanju između Evropskih zajednica i njihovih država članica i Bosne i Hercegovine.

Nije bilo rasprave o prijedlogu dnevnog reda.¹

Prema tome, Dom je za 37. sjednicu prihvatio sljedeći

DNEVNI RED

1. Davanje saglasnosti za ratifikaciju Sporazuma o stabilizaciji i pridruživanju između Evropskih zajednica i njihovih država članica i Bosne i Hercegovine.

U uvodnim napomenama predsjedavajući Niko Lozančić rekao je da je materijal za ovu tačku veoma obiman i da je, stoga, u pisanoj formi dostavljen samo klubovima poslanika, a da su svi poslanici materijal dobili na e-mail adrese. Podsjetio je da je na 10. zajedničkoj sjednici oba doma Parlamentarne skupštine BiH prezentiran Sporazum i provedena sveobuhvatna rasprava, te da stoga na ovoj sjednici nema potrebe za širom raspravom. Upoznao je Dom o tome da je na Proširenom kolegiju dogovoreno da se prigodnim uvodnim izlaganjem Domu obrati predsjedavajući Vijeća ministara BiH, a da, ako ocijene potrebnim, u raspravi učestvuje po jedan predstavnik svakog kluba poslanika.

¹ Branko Dokić pitao je zašto u dnevni red nije uvrštena njegova inicijativa u vezi s govorima predsjedavajućeg Predsjedništva BiH, ali je kasnije, na 38. sjednici, rekao da je to greškom iznio na ovoj sjednici, pa zato nije tretirano kao prijedlog za dopunu dnevnog reda.

Tako bi sjednica mogla biti završena za sat vremena, rekao je predsjedavajući Doma u uvodnim napomenama.

Poslije uvodnih napomena predsjedavajućeg Doma kraće izlaganje povodom Sporazuma podnio je predsjedavajući Vijeća ministara BiH Nikola Špirić.

Nikola Špirić je na početku pozvao poslanike da se u današnjoj raspravi isključivo rukovode konačnim ciljem, a to je punopravno članstvo u Evropskoj iniji. Rekao je da Sporazum, koji je potpisan 16.6.2008., ne može stupiti na snagu dok ga ne ratificiraju članice Evropske unije. Osnovna pretpostavka da članice EU ratificiraju Sporazum jeste da to učini Parlamentarna skupština BiH. Apelirao je na poslanike da se ratifikacija uradi najefikasnije što je moguće kako bi na taj način osigurali čvrst argument da od članica Evropske unije zatražimo što skoriju ratifikaciju u njihovim parlamentima. Današnja konstruktivna rasprava poslužila bi kao čvrst argument u našim rukama da snažnije zakucamo na vrata Evropske unije. Vijeće ministara BiH je od potpisivanja Sporazuma o stabilizaciji i pridruživanju preduzimalo mjere i aktivnosti s ciljem daljnjeg približavanja Evropskoj uniji. Na 2. tematskoj sjednici Vijeća ministara BiH o evropskim integracijama, održanoj 31.7. 2008., donesena je Odluka o uspostavljanju jedinica za evropske integracije, kojom se određuje uspostavljanje organizacionih jedinica i radnih mjesta u organima uprave BiH za obavljanje poslova koordinacije procesa evropskih integracija. Na 3. tematskoj sjednici, održanoj 25.9.2008., Vijeće ministara BiH usvojilo je Informaciju o potrebi uspostavljanja zajedničkih tijela za provođenje Sporazuma o stabilizaciji i pridruživanju, a na tematskoj sjednici, održanoj 6.10. 2008., donesena je Odluka o uspostavljanju Komisije za evropske integracije u sastavu Privremenog odbora za stabilizaciju i pridruživanje, čiji je prvi sastanak održan u Sarajevu 7. 10. 2008., rekao je predsjedavajući Vijeća ministara BiH Nikola Špirić u uvodnom izlaganju povodom ratifikacije Sporazuma o stabilizaciji i pridruživanju.

Nakon izlaganja predsjedavajućeg Vijeća ministara BiH, u raspravi su učestvovali: Halid Genjac, Azra Hadžiahmetović, Denis Bećirović, Martin Raguž, Rifat Dolić, Drago Kalabić, Momčilo Novaković, Jerko Ivanković Lijanović, Velimir Jukić i Branko Dokić.

Poslije rasprave, Dom je jednoglasno, sa 36 glasova "za" (Federacija BiH 26, RS 10), dao saglasnost za ratifikaciju Sporazuma o stabilizaciji i pridruživanju između Evropskih zajednica i njihovih država članica i Bosne i Hercegovine.

Zaključujući sjednicu predsjedavajući Doma Niko Lozančić još jednom je istakao važnost Sporazuma o stabilizaciji i pridruživanju za Bosnu i Hercegovinu. Dodao je da pred Parlamentarnom skupštinom BiH stoji veliki posao na usklađivanju zakonodavstva i ispunjavanju svih uslova na putu ka Evropskoj uniji i u tom kontekstu pozvao sve relevantne činioce u BiH na aktivan odnos kako bi u ispunjavanju svojih obaveza bili što uspješniji.

Predsjedavajući je, na kraju, obavijestio Dom da će Kolegij Doma uputiti pismo parlamentima svih država članica Evropske unije, s molbom da i one što prije stave na dnevni red ratifikaciju ovog sporazuma, te pozvao Komisiju za vanjske poslove i parlamentarne grupe prijateljstva da učine isto kod adekvatnih tijela parlamenata država članica Evropske unije.

Ovim je, u 11,10 sati, završena 37. sjednica Predstavničkog doma.

Sastavni dio Zapisnika je transkript sjednice.

SEKRETAR
PREDSTAVNIČKOG DOMA
Branka Todorović

PREDSJEDAVALAČI
PREDSTAVNIČKOG DOMA
Niko Lozančić